



# ԱՇԽԱՏՈՒԹՅՈՒՆՆԵՐ

ՀԱՅԱՍՏԱՆԻ  
ՊԱՏՄՈՒԹՅԱՆ  
ԹԱՆԳԱՐԱՆԻ

1(11)

ՎՅԱՍՏԱՆԻ ՊԼՏՈՒԹՅԱՆ ԹԱԴԻՐԱՆ

HISTORY MUSEUM OF ARMENIA

PROCEEDINGS  
OF THE HISTORY MUSEUM OF ARMENIA  
№ 1(11)

МУЗЕЙ ИСТОРИИ АРМЕНИИ

ТРУДЫ МУЗЕЯ ИСТОРИИ АРМЕНИИ  
№ 1(11)

YEREVAN 2023 ЕРЕВАН

ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆ

ԱՇԽԱՏՈՒԹՅՈՒՆՆԵՐ  
ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆԻ  
№ 1(11)

ԵՐԵՎԱՆ 2023

*Տպագրվում է Հայաստանի պատմության թանգարանի  
գիտական խորհրդի որոշմամբ*

Հրատարակվում է 1948 թվականից

*Խմբագրական խորհուրդ՝*

*Նժդեհ Երանյան. պ. գ. թ. – նախագահ,  
Հայկ Նազարյան, պ. գ. թ. – պարասխանապոս քարտուղար  
Արա Սանճեան, PhD (ԱՄՆ), Արսեն Բորոխյան, պ. գ. թ.,  
Համլետ Պետրոսյան, պ. գ. թ., պրոֆեսոր, Համո Սուքիասյան,  
պ. գ. թ., դոցենտ, Հարություն Մարության, պ. գ. թ., Հռիփսիմե  
Պիկիցյան, պ. գ. թ., դոցենտ, Հրաչ Զիլինկիրեան, PhD (Մեծ  
Բրիտանիա), Մխիթար Գաբրիելյան, պ. գ. թ., դոցենտ,  
Պավել Ավետիսյան, պ. գ. թ., ՀՀ ԳԱԱ թղթակից անդամ,  
Ռոբերտո Դան, PhD (Իտալիա), Ռուբեն Վարդանյան, պ. գ. թ.,  
Տորք Դալայան, թ. գ. թ.*

## ԲՈՎԱՆԴԱԿՈՒԹՅՈՒՆ

### ՅՆԱԳԻՏՈՒԹՅՈՒՆ

#### *Անասրիդա Ս. Բոնֆանտի, Ռոբերտո Դան*

Ասորեստանյան տարրերը բարձրավանդակի երկայթի դարի մշակույթում.  
Եղեգնաձորի գանձի զարդարված բրոնզե թասը (անգլ.)

8

### ՊԱՏՄՈՒԹՅՈՒՆ ԵՎ ԱՐԲՅՈՒՐԱԳԻՏՈՒԹՅՈՒՆ

#### *Արմեն Բադայան*

ՀԿ(Բ)Կ կենտրոնի նախագահության և քարտուղարության որոշումները  
ԱՄԴԻՏՀ և ԽՍՀՄ կազմավորման մասին (1921–1922 թթ.)

20

#### *Սեդա Գալստյան*

Հայաստանի Առաջին Հանրապետության սոցիալ-տնտեսական դրությունը  
1918–1920 թվականներին (ըստ ՀՊԹ-ի նյութերի)

43

#### *Անուշ Հարությունյան*

ԼՂԻՄ-ի և Քրդստանի գավառի ժողովրդագրության  
որոշ հարցեր (1920-ական թթ.). համառոտ ակնարկ (անգլ.)

66

#### *Վանիկ Վիրաբյան*

Ամերիկյան գնդապետ Ուիլյամ Հասկելի առաքելությունը  
Հայաստանի Հանրապետությունում և Անդրկովկասում (1919–1920 թթ.)

78

### ԱՉԳԱԳՐՈՒԹՅՈՒՆ

#### *Արտակ Ասարյան*

Պղնձագործությունը Արևմտյան Հայաստանում և Փոքր Ասիայի հայաբնակ  
վայրերում 19–20-րդ դարասկզբին (պատմաազգագրական ակնարկ)

104

#### *Լիլիա Ավանեսյան*

Մ. Գ. Իսակի «Գորգերի արտադրությունը Անդրկովկասում» գիրքը  
և խորհրդային գորգարտադրության զարգացման սկիզբը Հայաստանում (ռուս.)

124

#### *Միսիթար Գաբրիելյան*

«Ազգ»-ի գիտական ուսումնասիրության բանաձևերը «Ազգագրական հանդես»-ում  
(առաջին համարի «հրատարակչից» բաժնի քննություն)

138

#### *Աստղիկ Իսրայելյան*

Վասպուրականցի ոսկերիչները (19–20-րդ դդ.)

150

#### *Քարոշ Մալխասյան*

Ջուղայի տարազը (18–20-րդ դդ.)

173

**Հասմիկ Պերրոյան**

Գորգի վերականգնման սկզբունքները.  
միջազգային չափորոշիչներ, հայաստանյան փորձ 182

**ՄՇԱԿՈՒԹԱՅԻՆ ՄԱՐԴԱԲԱՆՈՒԹՅՈՒՆ**

**Ռուզաննա Ծարուրյան**

Չարենցի հուշարարի Չարենցավանում.  
գաղափարախոսությունը և ուրբանիզմը խորհրդային քաղաքում 206

**Նելլի Կարապետյան**

Անձնական հիշողությունից հանրային հիշողություն.  
ՀՊԹ երկու լուսանկար-տոհմաձագի մշակութային կենսագրությունը 217

**Հայկուհի Մուրադյան, Նժդեհ Երանյան, Համազասպ Աբրահամյան**

Ազգային ինքնության կառուցումը և խորհրդային մշակութային  
քաղաքականությունը. ըստ Հայաստանի պատմության թանգարանի  
որոշ արխիվային նամակների 230

**ՅԱՎԱՔԱԾՈՒՆԵՐ ԵՎ ԹԱՆԳԱՐԱՆՆԵՐ**

**Մերի Ավերիսյան**

Երևան քաղաքի պատմության թանգարանի սպասքի ցուցադրական  
համալիրների դերը մշակութային հաղորդակցության համատեքստում 244

**ՅԱՂՈՐԴՈՒՄՆԵՐ**

**Արուսյակ Ղազարյան**

Եղիշե Չարենցի անվան գրականության և արվեստի թանգարան.  
հայ գրականության և արվեստի շտեմարանը 252

**Լիլիա Ավանեսյան**

Եվգենյա Գյուգալյան. ընդհատված կենսագրություն 260

**ԼՈՒՍԱՆԿԱՐՆԵՐ**

263

Արտակ Ասատրյան  
Հայաստանի պատմության թանգարան  
sardarapatasatryan@gmail.com

**ՊՂՆՁԱԳՈՐԾՈՒԹՅՈՒՆԸ ԱՐԵՎՄՏՅԱՆ ՀԱՅԱՍՏԱՆՈՒՄ  
ԵՎ ՓՈԹՐ ԱՍԻԱՅԻ ՀԱՅԱԲՆԱԿ ՎԱՅՐԵՐՈՒՄ  
19–20-ՐԴ ԴԱՐԱՍԿՉԲԻՆ  
(ՊԱՏՄԱ-ԱՉԳԱԳՐԱԿԱՆ ԱԿՆԱՐԿ)\***

**Հիմնաբառեր.** Արևմտյան Հայաստան, պղնձագործություն, արհեստագործական կենտրոններ, առևտուր, Թոխատ, Երզնկա, Կարին:

**Ներածություն**

17-րդ դարի երկրորդ կեսին Օսմանյան կայսրության կազմում գտնվող Արևմտյան Հայաստանը վարչականորեն բաժանվում է Երզրումի (Կարին), Վանի, Սեբաստիայի (Սվազ), Ախալցխայի, Կարսի և Դիարբեքրի **նահանգների**<sup>1</sup> (այս և հաջորդ ընդգծումները հեղինակին են) (Մելքոնյան 2012, 6: Հայաստանի ազգային ատլաս 2008, 53, 55, 62): Չնայած ծանր քաղաքական ու տնտեսական պայմաններին՝ 1639 թ. Կասրե-Շիրիհի հաշտությունից հետո Արևմտյան Հայաստանը ինչ-որ չափով վերականգնեց Եվրոպա-Ասիա առևտրական միջնորդի երբեմնի դերակատարությունը: Տնտեսական ճգնաժամը հաղթահարելու նպատակով օսմանյան սուլթանները հարկադրված էին պարբերաբար ձեռներեց հպատակ առևտրականներին օժտել որոշակի արտոնություններով, հնարավորինս հովանավորելով միջազգային առևտուրը: Թեև մինչև 19-րդ դարի կեսերը ձեռնարկվող միջոցառումները մասնակի արդյունք տվեցին, և կայսրությունը շարունակեց մնալ հետամնաց ագրարային բոնատիրություն, այնուամենայնիվ, միջազգային առևտուրը, շտրեհիվ հայերի, հույների ու հրեաների, զգալի առաջընթաց ապրեց (Մելքոնյան, 2012, 6–7):

17-րդ դարի վերջերից Արևմտյան Հայաստանի տարածքով դեպի Եվրոպա, Կենտրոնական Ասիա ու Հնդկաստան իրականացվող առևտրով պայմանավորված

\* Ստացվել է 15.03.2023 թ., ուղարկվել է գրախոսման 17.03.2023 թ., ընդունվել է տպագրության 07.07.2023 թ.:

1 1555 թ. Ամասիայի և 1639 թ. Կասրե Շիրիհի պայմանագրերով Հայաստանը բաժանվեց Մեֆյան Պարսկաստանի և Օսմանյան կայսրության միջև: Օսմանյան կայսրությանն անցած Արևմտյան Հայաստանը բաժանվեց վեց նահանգների (թուրք. **Էյալեթ**, 1864 թ.-ից՝ **վիլայեթ**): Վերջինները բաժանվեցին գավառների (թուրք. **իվա** կամ **սանջակ**), որոնք էլ իրենց հերթին բաժանվում էին գավառակների (թուրք. **կազա**), որոնք էլ իրենց հերթին բաժանվում էին գյուղախմբերի կամ համայնքների (թուրք.՝ **նահիե**), տե՛ս Բաղայան 1986, 13: Մեր աշխատանքում նախապատվությունը տվել ենք հայերեն անվանումներին:



աճեց արևմտահայ քաղաքների, մասնավորապես՝ Էրզրումի, Վանի, Արաբկիրի, Թոխատի (Եվդոկիա), Ակնի, Կարսի, Բայազետի, ավելի ուշ՝ Մուշի, Բաղեշի (Բիթլիսի) նշանակությունը: Ի տարբերություն գյուղական կյանքի, որը շարունակեց մնալ ծայրագույն հետամնացության պայմաններում, քաղաքային կյանքը նկատելիորեն աշխուժացավ (Մելքոնյան 2012, 7):

Հատկանշական է, որ օսմանյան տիրապետության սկզբնական շրջանում՝ 16–17-րդ դարերում, Արևմտյան Հայաստանի և քաղաքները, և՛ գյուղերը գերագանցապես հայաբնակ էին (Մելքոնյան 2001, 31–34: Մելքոնյան 2005, 47, Մելքոնյան 2012, 7: Թոքմաճեան, 2016, 278–285):

Ի թիվս այլ արհեստների, նշված ժամանակաշրջանում Արևմտյան Հայաստանում և հարակից տարածքներում (պատմական Փոքր Հայքում, Փոքր Ասիայի հայաբնակ վայրերում) մեծ տարածում է ունեցել պղնձագործությունը, որն այս ընթացքում եղել է և՛ արհեստ, և՛ առևտրի կարևոր-առաջնային ճյուղ, որով ավանդաբար զբաղվել են հիմնականում հայերը (Պատրիկ 1974, 586–587: Սրվանձտյանց 1982, 183: Կարապետեան, 1992, 90, 93: Մելքոնյան 2012, 12–13: Սուքիասյան 2019, 437):

Մինչ այժմ 17–20-րդ դարասկզբի հայկական պղնձագործական արհեստին անդրադարձ է կատարվել մասնակի կերպով<sup>2</sup>: Մույն աշխատանքում, առաջնորդվելով արդեն գոյություն ունեցող պատմաազգագրական և արխիվային հարուստ նյութով և պատմահամեմատական մեթոդով, անդրադարձել ենք հայ ավանդական արհեստների այս կարևոր ճյուղին՝ նպատակ ունենալով տալ մետաղագործական արհեստի այս կարևոր ճյուղի զարգացվածության աստիճանն ու լայն տարածումը, ինչպես նաև դրա ունեցած տեղն ու դերը հայոց մեջ:

Աշխատանքին առավել համակարգված բնույթ տալու նպատակով արհեստագործական, ինչպես նաև առևտրական կենտրոններին անդրադարձել ենք ըստ տվյալ ժամանակաշրջանի գոյություն ունեցող վարչաքաղաքական բաժանման, քանզի, ինչպես կոտեսենք աշխատանքում, դրանք առավելագույնս փոխկապակցված են մեկը մյուսին:

### Սեբաստիայի նահանգ

Սեբաստիայի (Սվազ) նահանգը 19-րդ դարի վերջին և 20-րդ դարի սկզբին Օսմանյան կայսրության կազմում գտնվող Արևմտյան Հայաստանի ընդարձակ վարչատարածքային միավորներից էր և համապատասխանում էր հիմնականում Փոքր Հայքի տարածքին: Նահանգային կենտրոնի՝ Սեբաստիա քաղաքի անունով կրում էր «Սեբաստիայի վիլայեթ» անունը և բաժանված էր չորս սանջակների (գավառների)՝ Սեբաստիայի, Ամասիայի, Թոխատի (Եվդոկիա), Շապին-Գարահիսարի (Սահակյան 2002, 86: Սահակյան 2003, 77):

2 17–20-րդ դարասկզբի հայկական պղնձագործության անդրադարձել են մի շարք հեղինակներ՝ Կարապետեան 1977, 197–242: Տազևեան 2015, 375–398: Տազևեան 2022ա 339–350: Տազևեան 2022բ, 525–550, Ասատրեան 2016, 125–150, Ասատրեան 2018, 253–266: Ուշագրավ է, որ ժամանակի ընթացքում գրվել են բազմաթիվ գիտական աշխատություններ՝ նվիրված հին և միջնադարյան մետաղագործական արհեստներին, այդ թվում նաև պղնձագործությանը՝ Мартыросян 1977: Առաքելյան 1958 և այլն:

Սերաստիա նահանգի տնտեսության ու ժողովրդագրության մասին արժեքավոր տվյալներ է հաղորդում Գ. Զոհրապի «Սերաստիայի նահանգը տնտեսական և ազգագրական տեսակետից և հայերի դրությունը» հոդվածը, որը 1913 թ. անստորագիր հրապարակվել է Փարիզի «Pour les Peuples» հանդեսի 9-րդ համարում: Ըստ Զոհրապի՝ Արևմտյան Հայաստանի բոլոր վեց նահանգների հասարակական կյանքում հայ բնակչությունը առաջատարն էր թե՛ տնտեսական, թե՛ մշակութային գործունեությամբ (Սուքիասյան 2019, 437):

Ըստ 1912–1913 թթ. վիճակագրական տվյալների՝ նահանգի (Սերաստիա, Թոխատ, Ամասիա, Շապին-Գարահիսար) արտահանող 150 վաճառականներից 127-ը հայ էին, 23-ը՝ թուրք, իսկ ներմուծող 166 վաճառականներից հայեր էին 141-ը, թուրքեր՝ 13-ը, հույներ՝ 12-ը (Սուքիասյան 2019, 437): Ընդ որում, մետաղ ներմուծող առևտրականներից հայեր էին Սերաստիայում 12-ից 12-ը, Թոխատում՝ 5-ից 3-ը, 2-ը հույներ էին, Ամասիայում՝ 10-ից 10-ը, Շապին-Գարահիսարում՝ 4-ից 4-ը (Պատրիկ 1974, 586–588):

Ուշագրավ տեղեկություններ են պահպանվել նաև Սերաստիայի գավառում գոյություն ունեցող արհեստների, այդ թվում նաև պղնձագործության մասին: Այստեղ նույնպես, ինչպես Հայաստանի շատ վայրերում, արհեստները կենտրոնացած էին հայերի ձեռքում. «Քաղաքներու մէջ ամենուրեք արհեստները կեդրոնացած էին հայերուն ձեռքը: Հայն էր, որ կը ներմուծեր, կ'արտածեր, կը ստեղծեր և ժամանակի ու քաղաքակրթութեան հետ զուգընթաց կը քալեր: Հայը՝ ինչպէս անգլիացի Ատամ Կիպպոնը կ'ըսէր, «Ոսկի հակիթ ածող հաւն էր» Թուրքիոյ մէջ» (Պատրիկ 1974, 586):

Ըստ վերը բերված աղբյուրի՝ 1912–1913 թթ. Սերաստիա քաղաքում գոյություն ունեցող 1750 արհեստավորներից 1500-ը՝ հայ, 250-ը՝ թուրք. այլազգիներ չկային, Թոխատում՝ 800 արհեստավորներից 500-ը՝ հայ, 200-ը՝ թուրք և 100-ը՝ հրեա, Ամասիայում՝ 1000 արհեստավորներից 700-ը՝ հայ, 150-ը՝ թուրք, 150-ը՝ տարբեր ազգերի ներկայացուցիչներ, Շապին-Գարահիսարում՝ 400 արհեստավորներից 350-ը՝ հայ, 50-ը՝ թուրք. այլազգիներ չկային (Պատրիկ 1974, 586–587):

Ներկայացված թվերն առավել, քան հստակ պատկերացում են տալիս Սերաստիա քաղաքի, ինչպես նաև շրջակա քաղաքներում (գավառում) գոյություն ունեցող արհեստների և առևտրի մասին: Խոսելով Սերաստիա քաղաքում գոյություն ունեցող արհեստների մասին՝ հեղինակը դրանց թվում նշում է նաև պղնձագործների շուկայի մասին (պալարճինոց), որը բաղկացած էր 75 խանութներից (ներառյալ կլայեկագործները): Այստեղ պատրաստվում էին կաթսաներ, տնային զանազան սպասք, ափսեներ, սինիներ և այլն: «Յայտնի վարպետներ էին Ռուբէն Գազանճեանը, Յակոբ Չէօրէկճեանը, Ոսկան Ղորգորեանը, Ղազար Բրդոտեանը, Շահինեան Հաճի Արթինը, Ճէզվէճի Օվակը, Ստամայօյցեան Սկրը, Թորոս Տիշիկեանը և այլն» (Պատրիկ 1974, 605):

### Թոխատ (Եվրոկիա)

Շնորհիվ իր աշխարհագրական դիրքի՝ դեռևս 16–17-րդ դարերում Թոխատը Փոքր Ասիայի վաճառականության կենտրոնն էր (Ալպոյաճեան 1952, 1261–1266):

Վաճառականների քարավանները այստեղ էին գալիս ամեն կողմից՝ Մոսուլից, Բաղդադից, Դիարբեքրից, Իզմիրից, Կեսարիայից, Զմյուռնիայից, Սինուպից և այլ վայրերից (Ալպոյաճեան 1952, 1263–1264: Մելքոնյան 2012, 10): Պոլսից բերում էին զանազան ապրանքներ, Պոլիս ուղարկում՝ կտավ, պտուղ, **պղնձեղեն**: Էրզրու-մից բերում էին **պղինձ**, երկաթ, որն այնուհետև որպես պատրաստի արտադրանք կրկին ուղարկում էին Էրզրում (Ալպոյաճեան 1952, 1263–1264):

Ըստ Ղ. Ինճիճյանի նույն իրավիճակն էր Թոխաթում նաև 18-րդ դարի վերջում և 19-րդ դարի սկզբին. «ի Թօզատ գտան յառաջագոյն և գտանին ևս վաճառականք, զորոց նման սակաւ ունի տէրութիւն օսմանեան ընդ ամենայն սահմանս իւր, որ յԱսիա, անդ յաճախեն երթնելկութիւն կարաւանաց յամէնայն կողմանց, նաև վաճառականք հնդկաց ընդ Մոսուլ, նոյնպէս և վաճառականք պարսից...» (Մելքոնյան 2012, 10):

Հումքի բազային մոտ լինելը (Պատրիկ 1974, 6 – 7: Հայաստանի ազգային ատլաս 2008, 58) և արհեստագործական արտադրանքից ստացած եկամուտը հնարավորություն էին ընձեռում ու շահագրգռում հայ պղնձագործներին ավելի բարձր որակի ու մեծ քանակի ապրանք արտադրելու՝ գնորդի պահանջը բավարարելու, ինչպես նաև մրցակցությանը դիմանալու համար: 18-րդ դարավերջին և 19-րդ դարասկզբին, Ղ. Ինճիճյանի վկայությամբ. «Արհեստավորների առումով Թոխաթը պետք է կոչել քաղաք պղնձագործների կամ դազանչիների, որոնց արտադրածը համբավավոր և ընտիր է համարվում, քան օսմանյան տերության բոլոր վայրերինը: Թոխաթի պղնձե գեղեցիկ ամանները, սեղանի սպասքը, կրակարանները, կաթսաները և այլն տարածված էին Էրզրումում, Կոստանդնուպոլսում, Ամասիայում և ավելի հեռու՝ Սամսոնում և այլ նահանգներում» (Ալպոյաճեան 1952, 1266: ՀԺՊ 1974, 96): Այս քաղաքում հայ պղնձագործների արհեստն առանց վերապահության զարգացել և արվեստի էր վերածվել: Եվրոպիան դարձել էր հանուր Թուրքիայի կարևոր ու մեծ ապագա խոստացող կենտրոններից մեկը (ՀԺՊ 1974, 96: Հայաստանի ազգային ատլաս 2008, 172):

«Թոքադու շուկան ճոխ է, բայց անկանոն. Խանութները ցիր ու ցան: **Ամենեն նշանավոր արվեստն պղնձագործություն:** Արդնու մատենեն և Կապան մատենեն ելած պղինձները հոս կը հավլին և կը ձուլվին, և ասկե կը բաժնվին այլ և այլ կողմեր. հոս կը շինվին նաև ամեն տեսակ պղնձի անոթ: Երբեմն քաղաքիս բնակչաց մեծ մասն այս **արվեստով** կը շահվեին, բայց այժմ պակասած է: Արհեստավորք Հայք են»-նշում է հեղինակը, ով 1878 թ. (Սրվանձտյանց 1982, 183) ճանապարհորդում էր Արևմտյան Հայաստանի քաղաքներով (Սրվանձտյանց 1982, 223, 224):

13–19-րդ դդ. եվրոպացի հեղինակները նույնպես մեծարժեք տեղեկություններ են թողել Հայաստանի ու հայերի մասին (Զուլալյան 1985ա, 56 – 72: Զուլալյան 1985բ, 23 – 40: Ազիզյան 2003, 31 – 35: Մուրադյան, 2005, 61: Մալոյան 2006, 37 – 46: Դումբիկյան 167 – 174: Ստեփանյան 2012, 200–201, 205: Մխիթարյան 2017, 82–90): Նրանցից 19-րդ դարասկզբին Նապոլեոն Բոնապարտի կողմից Արևելք ուղարկված գեներալ Գարդանը Թոխաթ քաղաքի մասին խոսելիս նշում է. «Հազար կաթոլիկ հայեր կան այդտեղ: Պատրաստում են կտավեղեն, սակայն առևտրի գլխավոր նյութերն են 500000 օխա անագ և **մեծ քանակությամբ պղինձ**: Այս քաղաքը

մի պահեստ է Իզմիրի ապրանքների համար, որոնք հետո տարածվում են դեպի Էրզրում, Կեսարիա և Մոսուլ»: Նույն հեղինակը նկատել է, որ այս տարածաշրջանը ընդգրկված է իր հայրենիքի հետ կատարվող առևտրում, նշելով նաև, որ այդ առևտրում, մասնավորապես ասիական երկրներում, ամենամեծ դերակատարը հայերն են (Մելքոնյան 2012, 12–13):

1886–87 թթ. տվյալների համաձայն, ի թիվս այլ ապրանքների, Թոխաստ է ներմուծվել 100 000 օխա պղինձ և նույնքան էլ պղնձի կտորտանք, իսկ արտահանվում էր 300 000 օխա պղնձե անոթներ (Ալպոյաճեան 1952, 1291–1293):

Ըստ 1880 ական թթ. տվյալների՝ Թոխաստում, ի թիվս այլ արհեստով զբաղվողների խանութների, կար պղնձագործների 150 խանութ, աշխատողների ընդհանուր 250–300 հոգի քանակով, որոնք բոլորը հայեր էին (Ալպոյաճեան 1952, 1311–1312):

«Պղինձի վաճառականները ուրիշ քաղաքներէ անգործածելի դարձած պղինձի ամաններ բերել կու տային և ուրիշ կտորտանքներու հետ հալեցնել կու տային ղալխանելի մէջ: Հալած պղինձը մեծ ու փոքր կաղապարներու մէջ կը լեցնէին: Յետոյ ջուրին մէջ ձգելով կը պաղեցնէին և անոնց վրայի աւազը կը մաքրէին, իղով, աղով և անուշադրով (Ammoniac, նիշատր): **Այս աշխատանքը կը կատարէին թուրքերը, իսկ անկէ վերջ հայերն էին որ պղինձը կը գործէին, զանազան առարկաներու շինութեան համար:** Թափուած պղինձները (կիլիկ կը կոչուէր), կը տարածուէին չեքիճիներուն խանութը, ուր անոնք կրակով կը տաքցուէին և կարմրած վիճակի մէջ կը ծեծուէին 8–10 անձերու կողմէ: Ասոնցմէ մէկը ունելիով (ղսաճ) կը բռնէր կարմրած պղինձը և միւսները կարգով իրենց մուրճերը կը զարնէին, մինչ բռնողը շարունակ կը դարձնէր կատարեալ կանոնատրութիւնով: Այս կանոնատր և ներդաշնակ զարնուածքով կարծես թէ երածշտութիւն մը կը յօրինուէր, որուն նուագապետը կը հանդիսանար փոքր տղայ մը, որ սալին կը զարնէր չափը կամ կշռոյթը պահելու համար: Այս տղան կը կոչուէր **ղէյաւճի:** Այսպէս պղինձի կոյտեր շերտերու կը վերածուէին: Այս աշխատանցներուն մէջ մէկը միշտ կրակին դիմացն էր, պղինձները տաքցնելու համար, օգնական ունենալով փոքրիկ տղայ մը, որ փքոցը (**քէօրիկ**) կը գործածէր: Պղինձի տաքցած կտորները յաջորդաբար կը բերուէին սալին վրայ և տափակցուածները կը նետուէին ջուրը (Ալպոյաճեան 1952, 1276):

Կլոր թերթիկներու վերածուած պղինձները կը տարուէին պղնձագործներու խանութները, ուր կը շինուէին զանազան տնական ամաններ, սաներ և այլն: Խանութի մը մէջ վեցէն քսան անձեր կը գործէին, երկու շարքի վրայ, դէմ դիմաց նստած, իւրաքանչիւրը իր սալին վրայ աշխատելով: Պէտքին համաձայն սալերը և մուրճերը կը փոխուէին: Կը գործածէին նաև մկրատներ, կարկիններ, և ուրիշ գործիքներ: Այս խանութներուն մէջ նաև կար օճախ և քէօրիկ: Եթէ գործի օր մը, մէկը քաղաքին բլուրներն մին բարձրանար, կը լսէր ղազանճիներու խանութներուն մուրճերուն ձայնը, որ շատ հեռուներէն կը լսուէր: Երբ ամանները ղազանճիին խանութին մէջ ձևաւորուէին, կը տարուէին Չարխճիին խանութը, ուր մեքենայի մը վրայ անցուելով, կը տաշուէին անիով մը, որ կը դարձնէր մէկը՝ շարժիչի (մոթոր) դեր կատարելով: Ասկէ վերջն էր որ զոննիտ (զըմփառայ) թուղթով կը փայլեցնէին

և կը տանեին վաճառականին, որ խնամքով ծրարելով, սնտուկներով կը դրկեր Թուրքիոյ զանազան վայրերը, Գասթէնունի, Էնկիւրի, Գոնիա և Կիլիկիոյ զանազան քաղաքները, ուր վաճառ կը հանուէին (Ալպոյաճեան 1952, 1276–1277):

Քաղաքին մէջ գտնուող **թաճիւրները** գրաւած էին ամբողջ փողոց մը, որ **թաճիւրնոց** կը կոչուէր: **Այս պղինձեղէններէն ունանց վրայ ծաղիկներ, թռչունի պատկերներ և անուններ կը փորագրենի թաճիւրները, որոնք բացի երկու յոյներէ և մէկ թուրքէ, բոլորն ալ հայ էին:** Կային նաև **ըփրըզճի** կոչուած արհեստատրները, որոնք կը շինէին նրբարուեստ ամսէներ, գաւաթներ և այլն, զարմասալի նրբութեամբ և գեղեցկութեամբ (Ալպոյաճեան 1952, 1277):

Պղնձագործներու օժանդակներն էին կլայկեղողները (**դալայճի**), որոնք թէ՛ նոր և թէ՛ գործածուած ամանները կը կլայկէին զանոնք ժանգոտելէ արգիլելու համար: Բոլոր արհեստատրները ամէն առարկայ չէին կրնար շինել: Երբեմն նոյնիսկ մի քանի կտորներով, որոնք իրարու հետ ագուցած էին, կը կազմուէին անոնք: Դազանճիներու և չարխըճիներու պղնձի կտորները և տաշեղները կրկին ձուլարան տարուելով կը հալեցուէին և դարձեալ կը գործածուէին (Ալպոյաճեան 1952, 1277):

Պղնձագործութիւնը, ինչպէս կը տեսնուի, եռուզեռ ու մեղուաջան աշխատութեան վայր մը դարձուցած էր Եղոկիան» (Ալպոյաճեան 1952, 1277): Մեջբերվածն առավել քան անհրաժեշտ է, ցույց է տալիս Թոխաստում գոյություն ունեցող պղնձագործության արհեստի վիճակն ու պահպանվածությունը:

Ըստ 1895–96 թթ. տվյալների՝ չնայած տնտեսական անկմանը, Թոխաստի գլխավոր արհեստներից մեկը շարունակում էր մնալ պղնձագործությունը, որով զբաղվում էին 250–300 հայ՝ 10–60 տարեկան (Ալպոյաճեան 1952, 1320):

Էժան ասպրանք ստանալու ձգտումը և մրցակցությունը մեծապես վնասեցին պղնձագործական արտադրանքի գեղարվեստական մետաղամշակության գործ լինելուն: «Պղինձեղէնները դադրեցան նրբարուեստ ... գործեր ըլլալէ: **Ճարտար արհեստատր** հայուն դէմ կանգնեցաւ չէրչի հայը, և մեծ վնաս հասցուց Թոգատի արհեստներուն, պղինձեղէնները ամէլի կոշտ պատրաստելով... Պղինձի գործին մէջ Երուսալմէն էր մրցակիցը, իւր տարբեր նիւթերով պատրաստուած անօթներով և սաներով...» (Ալպոյաճեան 1952, 1320):

Թոխաթցի արհեստավորները մրցակցությանը դիմանալու համար ստիպված էին միջոցներ ձեռք առնել. «... եվրոպական պղինձ ու նուրբ կաղապարներու տեղ փայտէ կաղապարներ գործածել սկսան...», որպէսզի կարողանային սպրանքի գինը զեղչել (Ալպոյաճեան 1952, 1320):

## Արաբկիր

16-ից մինչև 18-րդ դարի երկրորդ կեսը Արաբկիրի գավառը ընդգրկված էր Սեբաստիայի նահանգում (Հայաստանի ազգային ատլաս, 2008, 53, 55, 62): 1880-ական թթ. այն մտցվել է Խարբերդի նահանգի մեջ (Սահակյան 2008, 155): Գավառի կենտրոնը համանուն քաղաքն էր (Փոլատեան, 1969, 45): Արաբկիր քաղաքում այլ արհեստների շարքում նշվում է նաև պղնձագործությունը (Փոլատեան, 1969, 139): Հեղինակը կարճ, սակայն դիպուկ կերպով նշում է, որ «Ասիական Թուրքիոյ

քաղաքներէն հազիւ մի քանին Արարկիի պղնձագործներու արտադրած առարկաները կրնան արտադրել կամ գերազանցել: Պղինձը Եւրոպայէն կը ներածուի» (Փոլատեան, 1969, 139):

### Կեսարիա

1639 թ. Կասրե-Շիրիսի պայմանագրից հետո (17-րդ դ. երկրորդ կեսից մինչև 18-րդ դ. առաջին կեսը) Կեսարիան ընդգրկված էր Կարամանի էյալեթում (Հայաստանի ազգային ատլաս, 2008, 53, 55), իսկ 18-րդ դ. երկրորդ կեսից՝ Կեսարիայի փաշայությունում (Հայաստանի ազգային ատլաս 2008, 62):

Հեղինակը, վկայակոչելով մի շարք պատմագագագրական աղբյուրներ, խոսելով 19-րդ դարում և 20-րդ դարակազբում Կեսարիայում գոյություն ունեցող արհեստների ու առևտրի մասին, նշում է «Գաղափար մը տալու համար թէ կեսարահայերը ինչ դիրք ու դեր ունէին, պիտի տամ անունները **գլխաւոր ճարտարարեստական** տուններուն և արհեստատրներուն» (Ալպոյաճեան 1937, 1497): Այնուհետև թվարկում է **ճարտար արեստներն** ու արհեստները՝ ետգմայի արհեստագործներ (Ալպոյաճեան 1937, 1498), ոստայնանկներ կամ ջուլիակներ (Ալպոյաճեան 1937, 1499), գորգագործութիւն (Ալպոյաճեան 1937, 1499), ..., ոսկերչութիւն (Ալպոյաճեան 1937, 1513), ժամագործութիւն (Ալպոյաճեան 1937, 1518) և այլն...

Վերը թվարկված շարքում հեղինակը ծավալուն և արժեքավոր պատմագագագրական տեղեկություններ է հաղորդում պղնձագործական արհեստի ու արհեստավորների քանակի մասին, որից մի քանի հատված անհրաժեշտ ենք համարում մեջքերել ամբողջությամբ. «... Կեսարիոյ մէջ բաւական զարգացած էր նաև պղնձի մետաղագործութիւնը, և բազմաթիւ վաճառականներ կային որ ո՛չ միայն պղինձը կը ներածէին այլ զայն գործել կուտային արհեստավորներու, և պղնձեղէն անօթներու վաճառականութիւնը կ'ընէին,- նշում է հեղինակը, ապա շարունակում,- միակ բացառութիւնն էր ծերունի Կարապետ Ճամճեանը (պղնձեղէնի վաճառական Ճամճեաններէ տարբեր ընտանիքէ մը) որ միայն **պղինձ տախտակները** կը ներածէր և արհեստատրներուն կը ծախէր, միւսները՝ արհեստատրներու պատրաստել կու տային պղնձեղէններ որոնք **Թօզատի գործերուն չափ յաջողակ էին**» (Ալպոյաճեան 1937, 1518–1519): Ինչպես տեսնում ենք, Թոխատի պղնձեղէն արտադրանքն այնքան կատարյալ էր, որ դարձել էր համեմատության և որակի չափանիշ:

Կեսարիայում կար 35 պղնձագործ, ովքեր աշխատում էին վաճառականներից գնված պղնձով և հաճախ ստիպված էին ենթարկվել նրանց թելադրած պայմաններին: Այս պատճառով 1890-ական թվականների սկզբներին պղնձագործ արհեստավորները երկարատև գործադուլ են կազմակերպում, որից հետո «Հաճի Յովհաննէս Մարթաեան այս տեսակ անպատեհութեանց տեղի չտալու համար կը կազմակերպէ պղնձագործ էսնաֆը, իր արհեստապետութեամբ, սակայն 1893ի Փոքր Հայքի յեղափոխական կազմակերպութեան մատնութեան հետևանօք, երբ կառավարութիւնը կը հալածէր Հայերը, վաճառականները կազմալուծելու համար այս միութիւնը, կառավարութեան մատնանիշ կ'ընեն զայն և Հաճի Յովհաննէս Մարթաեան կը ձերբակալուի և կը բանտարկուի: Կառավարութիւնը զինքը կը

հարկադրե հրաժարիլ **Էսնաֆ պաշխուրենե** և ուրիշ մարդ մը կ'անուանե, որ անձեռնահաս ու անկարող, չի կրնար գործը շարունակել և գրեթէ այս միջազգային-վասնզի Յոյն և Թուրք պղնձագործներ ալ կային-կազմով Էսնաֆական միութիւնը կը կազմալուծուի: Տասնեակ մը տարիներ վերջը, կրկին բարեսիրտ վաճառական մը նկատելով որ քաղաքին Հայ 35ի չափ արհեստատուները երբեմն դրամական անցուկ վիճակի մը մատնուելով կ'ստիպուին բաղրոններու քմահաճոյքին խաղալիք ըլլալ, անոնց պէտքերը աժան աժան հայթայթելով, այս արհեստատուներուն մէջէն 7 հոգի ընտրելով արհեստատրական ժողով մը կը կազմէ, և անոր տրամադրութեան տակ կը դնէ դրամագլուխ մը, որպէսզի նեղութեան մէջ գտնուող արհեստատրին գործ հայթայթուի կամ փոխատուութիւն ըլլալ: Բնական է, որ այս կարգադրութեան շնորհիւ արհեստատուները այլևս չստիպուեցան իրենց աշխատութիւնները նուազագոյն վարձքով ծախել ուրիշին» (Ալպոյաճեան 1937, 1519):

Արհեստավորական այս ժողովը նաև իր կարգավորիչ դերն ուներ: Օրինակ, երբ պղնձագործ արհեստավորներից մեկն իրեն հարբեցողոյթյան տար, մյուսները հորդորներով ու այլ միջոցների դիմելով աշխատում էին ամեն ինչ անել, որ նա թողներ իր այդ սովորությունը և սեփական ընտանիքը թշվառության գիրկը չնետեր **«Այս օգտակար ընկերակցութիւնը,- նշում է հեղինակը,- որ չափազանց պատուաբեր էր Կեսարիոյ համար, դժբախտաբար երկար կեանք չէ ունեցած»** (Ալպոյաճեան 1937, 1520):

### Այնթապ (Մարաշի նահանգ)

Պղնձագործությունը զարգացած էր նաև Այնթապում: 19-րդ դարի կեսերին այստեղ գործում էին շուրջ 60 արհեստանոց: Յուրաքանչյուր արհեստ ուներ 4–10 գործավոր, որոնք բավականին բարձր էին վճարվում, հատկապես՝ վարպետները (Կարապետեան 1992, 90):

«Ինչպէս վկայում է Գ. Պարսումեանը, Այնթապի առաջին պղնձագործները կլայագործներ էին, որոնք անագապատելուց առաջ, նախնական գործիքներով շտկում էին պնակների և կաթասների ծոմնուած մասերը: 19-րդ դարի կեսերին Այնթապում մի շարք կլայագործներ հնտացան պղնձագործութեան մէջ և սկսեցին արտադրանք տալ: Նախապէս Այնթապի պղնձեղէնը եկել է Թոքթաթից: «1915-ի առեւնները, շատ տուներ դեռ կը գործածէին Թոքթատի գործ պղնձեղէններ»: Գ. Պարսումեանը վկայում է, որ նախքան ևրոպական պղնձի (**Ֆիրենք պաքրըր**) ներածումը, բացուած պղնձաթերթը բերուել է Մարաշից» (Թոքմաճեան 2016, 18 -19):

Աչքի ընկնող պղնձագործական տներն էին Արսլանյանների պղնձագործական տները, որոնք բաժանված էին չորս ճյուղի՝ «1. Արսլանեան Պապայեանց գերդաստանը՝ վաճառական-պղնձագործ, 2. Գառնը Պէօյիւքեանց գերդաստանը՝ վաճառական-պղնձագործ, 3. Ջիուտ Արսլանեանց գերդաստանը, 4. Պապա Շահեանց գերդաստանը»: Նրանց հաջորդում էին «...Գնաճեան, Սրապիոնեան, Մաղաքեան, Մանուկեան և Փաթանեան գերդաստանները: Ասոնցմէ վաճառական-պղնձագործ էր Գնաճեանն ալ»: Նշանավոր պղնձագործ վարպետներ էին «Պարպարա Կարուճը, Սրապիոն Սրապիոնեանը, Ներսէս Մանուկեանը, Ներսէս, Ատուր և Յովհաննէս Ասլանեան եղբայրները, Գէորգ Փաթանեանը, Ներսէս Կի-

լեւերեանը (Կարապետեան 1992, 90), Լևոն, Մովսէս, Նազար և Պետրոս Անսրը-լեան եղբայրները» և ուրիշներ (Թոքմաճեան 2016, 278 -285): Սակայն պղնձագործ վարպետներու ամենէն յայտնին էր Մելքոնի տղայ Կարապետ Խալֆէն, որ **գալենքիար** պատուանունն էր շահեր իր փորագրութիւններուն և կիսաքանդակներուն համար: Իր յաջորդն եղաւ Մելքոն Ուստան, որ ի միջի այլոց շինեց թորիչ մեքենայ մը ճշգրիտ կերպով գտնելու համար օղիի բարկութեան աստիճանաչափը: Փոխանակ Տէրգօր քարտուելու՝ ինչպէս հազարատրներ՝ քարտուեցաւ Դամասկոս Ճեմալ փաշայի հրամանով, ուր և մեռաւ 1918-ին» (Կարապետեան 1992, 90, 93):

Արսլան-Պապան ուներ երեք որդի, ովքեր հայտնի էին «...Պապա-Շահի տղաք անունով: Երեք եղբայրներ էին անոնք՝ Ներսէսը, Ատուրը և Յովհաննէսը: Ատուրը մեռաւ Հալէպ. 1946-ին Յովհաննէսը ներգաղթեց Հայաստան, ուր և մահացաւ յետագային: Ներսէսի գաւակներէն Արևը քանիցս արժանացաւ յիշատակութեան և մրցանակի պղնձեայ, պրոնզեայ և արծաթեայ արուեստագիտական իր արտադրութեան Ինքն էր որ պատրաստեց Երուանդ Քոչարի **Սասունցի Դաիթ** արձանին պղնձապատումը» (Կարապետեան, 1992, 93):

Հայտնի փորագրող վարպետներ՝ **գալենքիարներ** էին «Իշխանեանը, Պանտալեանը, Իսկենեանը և Պոշկեզենեանը» (Կարապետեան 1992, 94):

### Խարբերդի նահանգ

Խարբերդի նահանգը (Մամուրեթ – ուլ - Ազիզ) ներառում էր Խարբերդի, Դերսիմի ու Մալաթիայի գավառները և մեկ տասնյակից ավելի գավառակներ: Կազմավորվել է 1879–80 թթ., (Դիարբեքիի նահանգի արևմտյան մասում) երբ Խարբերդի գավառին կցվեցին Մալաթիայի և Արդանայի գավառները, իսկ 1888-ին՝ առանձին նահանգ հանդիսացող Դերսիմը (Հայկ, 1959, 38: Փոլատեան 1969, 40–41, Բարլումյան 2008, 168 – 169: Բաղայան 2020, 154–155):

19-րդ դ. կեսերին Խարբերդն առևտրաարհեստավորական կենտրոն էր. արտահանվում և ներմուծվում էր ապրանքի լայն տեսականի: Առևտրական կապեր ուներ Հալեպի, Պոլսի, Տիգրանակերտի, Այնթապի, Մերաստիայի, Սամսոնի, Թոխատի, Ադանայի, Արաբկիրի, Բալուի, Մալաթիայի, ինչպէս նաև արտասահմանյան այլ երկրների հետ (Հայկ 1959, 638):

Խարբերդը քաղաքից 40 մղոն հեռավորության վրա էր գտնվում Արդնի Մատէն կամ Պախր Մատէն հին քաղաքը, որն իր անունը ստացել էր շատ մոտ գտնվող պղնձի հանքերի շտրիիվ (պախր՝ թուրք. պղինձ): 19-րդ դ. կեսերին քաղաքի բնակչությունը հաշվվում էր 800 տուն, որոնցից 200-ը՝ հայ, 200-ը՝ թուրք, 400-ը հույն, որոնք ապրում էին համապատասխանաբար իրենց թաղերում (Հայկ 1959, 656):

«Մատէնի պղինձի հանքերը նշանատր էին իրենց որակով և քանակով: Երկար տարիներու պեղումները յառաջ տարուած էին անշուշտ նախնական միջոցներով, սակայն հանքին առատութիւնը արտասովոր էր և պղինձի երակներուն տարածութիւնը անոր շրջակայքին մէջ կարծես վերջ չունէր ամայի հողերուն տակ առատօրէն ցրուած» (Հայկ 1959, 656):

Հանքահանությունը կատարվում էր նախնական պարզ եղանակով: Հանքը փորում էին բահով ու բրիչով, հետո կողովներով հարյուրավոր աստիճաններով



բարձրացնում վեր: Այնուհետև «հողախառն նիւթերը վառելով՝ մետաղը կը գատէին հողէն: Այս գործողութիւնը կը կոչէին **Ֆիլիքս**, որ հաւանաբար յունական բառ մըն է: Հանուած մետաղը հալեցնելու և ձուլելու համար կը փոխադրուէին գետին եզերքը շինուած ձուլարաններու մէջ (Իսպլխանէ): Պղինձը կարմիր ջուրի նման կը հոսէր ձուլարաններուն մէջ, հոն կը կաղապարուէր, կը պաղէր, որպէսզի պատրաստ ըլլար հեռաւոր տեղեր, Կ. Պոլիս և մինչև Անգլիա դրկելու» (Հայկ 1959, 657–658):

Հաստատված է, որ ձուլած պղինձը պարունակում էր որոշակի քանակությամբ ոսկի: Երբ պղնձի ձուլակտորները պարբերաբար տեղափոխվում էին Անգլիա, այնտեղ կրկնակի ձուլման ենթարկելով գատում էին ոսկին պղնձից և դրանով փակում փոխադրության ծախսերը (Հայկ 1959, 658–659):

Ըստ 19-րդ դարի 80-ական թթ. մի հաշվարկի՝ Պախըր Մատէնի պղնձահանքերն այնքան շատ էին, որ նույնիսկ քաղաք տեղափոխված և շինարարության մէջ գործածված քարերը պղնձախառն զանգվածներ են եղել: Նույնիսկ դրանով հանդերձ՝ տարեկան մինչև 2 000 000 օխա՝ 3000 տոննա պղինձ էր արտադրվում՝ 240 000 թուրքական ոսկի ծախսով, որն Օսմանյան պետության համար մեծ եկամուտ էր ապահովում (Հայկ 1959, 659):

1914 թ. երբ Գերմանիան իր ձեռքն առավ Թուրքիայի նկատմամբ վերահսկողությունը, մեծ քանակությամբ պղինձ տարվեց Գերմանիա (Հայկ 1959, 659):

Քաղաքում, ի թիվս մի շարք առևտրական տների ու գործարանների (Հայկ 1959, 638–643), գործում էր նաև Բարիկյան եղբայրների երկաթագործական գործիքներ պատրաստող գործարանը (Հայկ 1959, 644–648): Այստեղ «... երկաթը, պղինձը, արոյրը և այլն կը սկսին հալիլ և ջուրի պէս վազել՝ արտադրելով ցորենի, բամպակի և երկրագործութեան յատուկ բազմաթիւ գործիքներ:

Գործարանը և անոր արտադրութիւնը մեծ համբաւ կը ստանան: Գործիքները կը սկսին դրկուիլ ոչ միայն Խարբերդի երկրագործներուն, այլ Թուրքիոյ զանազան կողմերը, մինչև Պարսկաստան: Այս նորահնար մեքենաները դաշտի աշխատատրներու հնադարեան դանդաղ և անհաստատ գործիքներուն քով կը դառնան հրաշալի, առևտուրը կը ճոխացնեն և յաջողութիւնը կը դարձնեն անխուսափելի» (Հայկ 1959, 645):

## Դերսիմ

Վարչական կենտրոնը, ինչպես վերը նշվեց, Դերսիմ քաղաքն էր՝ շրջակա տասը գյուղաքաղաքով և չորս հարյուր յոթանասուն գյուղով (Հալաջյան 1973, 31–32):

Դերսիմում նույնպես պղնձագործությունն առավելապես գտնվում էր հայերի ձեռքում: Տեղացի արհեստավորները Խարբերդից, Տիգրանակերտից, Երզնկայից և նույնիսկ Կարինից բերված պղնձե սպիկներից տեղում պատրաստում էին կաթսաներ (կատսա, խալկիներ, թրք՝ դազան), սաներ, ափսեներ, սինիներ (կերակրի մատուցման համար), սիթիլներ (փարխաջ), կյուկյումներ, լականներ, կերակրի մեծ ու փոքր ամաններ, թասեր, սկավառակներ, բաժակներ, կոնքեր, **ջրածիկներ (ըպրզ)** և տնային զանազան իրեր (Հալաջյան 1973, 168):

Պղնձագործի արհեստանոցում օգտագործված ամենագլխավոր գործիքները շատ նախնական էին՝ փուքս, սալ, երկաթե և փայտե մուրճ, ունելի, կտրոց, պողպատե սրածայր դուր, ծակող կլոր բիզ, երկաթե կլոր լծակ և այլն (Հալաջյան 1973, 168):

Արտադրանքի գլխավոր հիմքը մարդկային ուժն էր, գորավոր աչքը, ուժեղ բազուկը, փայտե կլոր մուրճի ուղիղ հարվածը և հմտությունը (Հալաջյան 1973, 168):

Նույն արհեստով զբաղվող վարպետները համախմբվում էին նույն հրապարակում կամ շուկայում, մեկը մյուսին կից կրպակներում կամ փոքրիկ խանութներում (Հալաջյան 1973, 168):

Պղնձե ամանները ծաղկազարդված էին զանազան գծանկարներով՝ թռչունների, եղևիկների, ձկների նկարներով, որոնք նրբությամբ փորագրված էին պողպատե սրածայր դուրի օգնությամբ (Հալաջյան 1973, 168):

Պղնձագործության պաշտպան և հովանավորող սուրբը Պողոս-Պետրոսն էր, որի անվանակոչության տարեդարձի օրը տոն էին համարում և չէին աշխատում» (Հալաջյան 1973, 168):

### Մալաթիա

Մալաթիայի գավառը գտնվում էր Փոքր Հայքի հարավում, Եփրատի աջակողմյան վտակ Մելասի ավազանում: Գավառն ունեցել է հարուստ պատմական անցյալ. 1178–1315 թթ. ընթացքում գտնվել է սելջուկ-թուրքերի, 1315–1516 թթ. ընթացքում թուրքմենական ցեղերի իշխանության տակ: 1516 թ. հայտնվել է Օսմանյան թուրքերի տիրապետության տակ և դարձել Սեբաստիայի էյալեթի մի մասը: Գտնվելով տարբեր երկրամասերի հարևանությամբ ու մեջտեղում՝ Մալաթիան հաճախ կցվում էր այս կամ այն նահանգին (էյալեթին): 1870-ական թթ. այն մտցվել է Խարբերդի (Մամուրեթ-ուլ-Ազիզ) նահանգի մեջ: 19-րդ դարի վերջին Մալաթիայի գավառը բաժանվում էր հինգ գավառակների՝ Մալաթիա, Աջքաթաղ, Հիսնի Մանսուր, Քյախտե և Պեհեսնի: Վերոնշյալ բաժանումը պահպանվեց մինչև 20-րդ դարի սկիզբը, որի մասին է վկայում 1914–1915 թթ. թուրքական պաշտոնական վիճակագրությունը: Մալաթիա գավառակի կենտրոնն էր Մալաթիա (Մելիտենե) քաղաքը (Մահակյան 2007, 209)՝ շրջակա 150 գյուղերով (Ալպոյաճեան 1961, 463):

**Մալաթիայում** նույնպես արհեստների մեծ մասը պահպանվել էր ավանդական ձևերով և գտնվում էր հայերի ձեռքում (Ալպոյաճեան 1961, 986, 1004): Գոյություն ունեցող արհեստներն էին՝ կոշկակարություն, ... **պղնձագործություն**, ոսկերչություն, ... զինագործություն, դարբնություն, երկաթագործություն, թիթեղաշինություն, ... պայտարություն և այլն ... (Ալպոյաճեան 1961, 986):

**Եվրոպայից որպես նախապատրաստուկ ներմուծվում էին պղնձե գնդերը**, որոնք այնուհետև հայ արհեստավորները տեղում ծեծելով (**ազատ կոմամբ**), վերածում էին պղնձե թերթերի, որից հետո էլ դրանցից պատրաստում առտնին իրեր, որոնք այնուհետև կլայելվում էին՝ օքսիդացումից պաշտպանելու համար: Գրեթե բոլոր տներում հանդիպում էին պղնձե սինիներ, որոնք շատ հաճախ հար-

յուրավոր տարիների հնություն ունեն (Ալպոյաճեան 1961, 1004):

Մալաթիայից դեպի Հալեպ, Այնթապ, Եդեսիա, Տիգրանակերտ, Խարբերդ, Ան, Արաբկիր, Երզնկա, Սեբաստիա, Եվդոկիա, Կեսարիա, Սամսոն, Պոլիս և Եվրոպա էին արտահանվում կարպետ, գորգ, յուղ, պանիր, մեղր, ծխախոտ, տախտակ և այլն (Ալպոյաճեան 1961, 987–988), ներմուծվում՝ բրդեղեն, բամբակեղեն, մետաքսեղեն, շաքար, քարյուղ, **պղինձ**, երկաթ, կլայեկ, գամ, մոմ և այլն... (Ալպոյաճեան 1961, 988), Մարաշից ներմուծվում էր **պղինձ**, Երզնկայից՝ **պղնձե ամանեղեն**, Թոխաստից (Եվդոկիա)՝ **պղնձե տախտակներ** (հումք՝ նախապատրաստուկ – Ա. Ա.), **պղնձե ամանեղեն** և այլն... (Ալպոյաճեան 1961, 989, 1000):

Առաջին արհեստակցական միությունը 1908 թվականից հետո կազմել են պղնձագործներն ու անագագործները միասին, որոնք բոլորն էլ հայեր էին, որովհետև, – ինչպես նշում է հեղինակը, – պղնձագործությամբ զբաղվող նույնիսկ մեկ թուրք չկար: «Պղնձագործերը, որոնք հարուստ էին, կամ անելի ճիշդը ունևոր, կը շինէին նոր ամաններ: Ասոնք գիները կտորելով իրարու ձեռքէն յաճախորդ կը կորզէին և այս մրցումին պատճառով վարպետները չէին կրնար գոհացուցիչ կերպով վարձատրել իրենց աշխատատեղերը: Միութիւնը կազմուելէն ետք, ամաններուն համար որոշ գիներ որոշուեցան, այդ գիներէն պակաս ծախողներուն համար տուգանք սահմանուեցաւ և այսպէս համաձայնութիւն մը ստեղծուեցաւ, և անելի նպաստատրուեցան: Պղնձագործերը քաղաքին մէջ կը գործէին և գիւղերը երթալու պէտք չունէին, բաւական ապահով ապրուստ մը և ընդհանրապէս համեստ դրամագլուխ մը ունենալով: Իսկ դրամագլուխ չունեցողները կլայեկելու գործով կը զբաղէին, և որպէսզի յաճախորդներուն դիրութիւն տաին, չէին սպասեր, որ անոնք քաղաք գան, այլի իրենք կ'երթային գիւղերը ապրուստ ճարելու համար: Մինչև այս միութիւնան կազմակերպութիւնը կլայեկողները – մանաւանդ անոնց գիւղերը շրջողները – ամենէն անելի շահագործողներն էին» (Ալպոյաճեան 1961, 1009–1010): Ուշադրություն դարձնենք այն հանգամանքի վրա, որ այստեղ նույնպես, ինչպես և Կեսարիայում, արհեստակցական միությունն ուներ հասարակական – կարգավորիչ դեր:

### Էրզրումի նահանգ

Նահանգի կենտրոնն Էրզրում (Կարին) քաղաքն էր: Որպես քաղաքային բնակավայր ձևավորվել է 5-րդ դարի առաջին տասնամյակներին, երբ Բյուզանդիայի Թեոդոսիոս 2-րդ կայսրը (408–150) ընդարձակելով բնակավայրը շրջապատող պարսպաշարը և ամրացնելով միջնաբերդը, այն վերանվանեց **Թեոդոսուպոլիս** (հայկական սկզբնաղբյուրներում՝ «**Կարնոյ քաղաք**») (Բաղայան 2015, IV):

Էրզրում-Կարինը եղել է հայ գրչության և, ընդհանրապես, հայ մշակույթի նշանավոր կենտրոններից մեկը (Բաղայան 2015, V): Արդեն 17-րդ դարի երկրորդ կեսի ֆրանսիացի ճանապարհորդ Տավերնիեն հավաստում էր, որ Էրզրումը Օսմանյան կայսրության տարանցիկ առևտրի կարևորագույն կետերից է (Մելքոնյան 2012, 7–8): Մեկ այլ ֆրանսիացի՝ 18-րդ դարասկզբի հեղինակ Պիտտոն դե Տուրնեֆորն ուղղակիորեն հաստատում է իր հայրենակցի միտքը. «Այս քաղաքը (Էրզրումը) Հնդկաստանից եկող ապրանքների համար տարանցիկ առևտրի կենտրոն է և

հանգստավայր...: Բոլոր ապրանքները, որոնցից գլխավորներն են Պարսկաստանի մետաքսը, բամբակը, թմրադեղերը, զանազան գույների մահուդը, անցնում են միայն Հայաստանի վրայով...: Մենք զարմացել էինք՝ տեսնելով Էրզրում ներմուծված այդքան մեծ քանակությամբ ներկ, որ կոչվում էր բոյա և օգտագործվում կաշվե ու բրդե գործվածքների ներկման համար» (Մելքոնյան 2012, 8):

18-րդ դարավերջի հայ աշխարհագետ Ղ. Ինճիճյանի վկայությամբ՝ Էրզրումի բարգավաճ վիճակի հիմնական աղբյուրը Հնդկաստանի ու Եվրոպայի միջև ընթացող տարանցիկ առևտրական ճանապարհների վրա գտնվելու հանգամանքն էր: Նույն հեղինակի խոսքով, այս քաղաքը զանազան ապրանքներ, հատկապես մորթեղեն, դեղորայքի կենդանական հումք, Ախալցխայից ստացված չորացրած մրգեղեն, **Թոխասից բերված պղնձե անոթներ**, գորգեր ու կարպետներ և այլն, առաքում էր գրեթե բոլոր ուղղություններով՝ մինչև Գաղիա (Ֆրանսիա), Հոլանդիա, Անգլիա, Գերմանիա: Քաղաքը սերտ տնտեսական կապեր ուներ նաև Մոսկվայի, Կոստանդնուպոլսի, Բալկանների, միջինասիական Բուխարա քաղաքի, Պարսկաստանի, Հնդկաստանի ու արաբական երկրների հետ (Մելքոնյան 2012, 8: Զատիկյան, 2013, 59):

1818 թ. Կարինում կար պղնձագործական 29 արհեստանոց: Սրանք գործում էին միավորված և 1826 թ. մշակել էին «Գիր ուխտադրության և պայմանի» նշանավոր կանոնադրությունը, մի փաստաթուղթ, որը կասկած չի թողնում Կարինում եղած պղնձագործության բարձր մակարդակի մասին (ՀԺՊ, 1974, 96):

Էրզրում-Կարինն Արևմտյան Հայաստանի առավել խոշոր բնակավայրերից էր: Տարբեր տվյալներով 1914 թ. այն ուներ ավելի քան 55000 բնակիչ: Հայերի թիվը հասնում էր 14000–15000-ի (որոշ աղբյուրներ նշում են 20000 թիվը) (Բաղայան 2015, IV):

Թվարկելով Էրզրումում և Կարսում 19-րդ դարավերջում գոյություն ունեցող արհեստները՝ Խ. Մառանկոզեանը, նշում է նաև պղնձագործությունը, որն ըստ ճյուղերի բաժանվում էր երեք խմբի. «1. դազանճի (պղնձագործ), քէլճի (սրանք հին ամանները կամ պղնձի հանածոյն հալելով ծախում էին), կլեկճի (անագապատողներ – Ա. Ա.)» (Մառանկոզեան 1891ա, 2):

19-րդ դարավերջին և 20-րդ դարասկզբին Էրզրումում գոյություն ունեցող արհեստների, առևտրի, բնակչության ու կենցաղի մասին տեղեկություններ են պահպանվել Երվանդ Լալայանի «Կարնոյ գաղթականություն» 80 էջանոց ձեռագիր աշխատության մեջ<sup>3</sup>:

«Էրզրումի բնակիչներից հայերը գլխատրապէս պարապում էին վաճառականութեամբ: Էրզրումը Պարսկաստանի և Տաճկաստանի փոխադրական վաճառականութեան կեդրոնն էր, ուստի և թե տեղացի և թե օտար վաճառականներ անդադար լցվում էին Էրզրում և ծաղկեցնում վաճառականութիւնը: Ներբերում

3 Ե. Լալայանի «Կարնոյ գաղթականություն» 80 էջանոց ձեռագիր աշխատությունը մասնակի ուղղումներով և կրճատումներով լույս է տեսել «Բանբեր Հայաստանի արխիվների» գիտական պարբերականի 1974 թ. 3-րդ համարում (էջ 83–96), իսկ ամբողջական աշխատությունը տպագրվել է Ե. Լալայանի «Երկեր»-ի I հատորում (Երևան 1983), էջ 415–440: Մեր աշխատանքում (համեմատելով նշյալ երկու աշխատանքների հետ) նախապատվությունը տվել ենք բնօրինակին՝ մեջբերելով այն հատվածները, որոնք անհրաժեշտ են այստեղ:

էին՝ օսմանյան սահմաններից-շաքար, սուրճ, նիշատիր, լեղակ, կարմիր որդան, հինա, երկաթ, պողպատ, **պղինձ**: ... (Լալայան, Կարնոյ Գաղթականություն, 13)

Իսկ արտահանում էին՝ ցորեն, գարի, զանազան **պղնձեղէն** և արծաթեղէն շինուածքներ, զենք և այլն: Բացի վաճառականությունից, ժողովուրդը պարապում էր և արհեստներով, որոնցից առավելապես ծաղկած էր պղնձագործությունը» (Լալայան, Կարնոյ Գաղթականություն, 14):

### Երզնկա

12 – 14-րդ դարերի Հայաստանի քաղաքների մեջ, որպես միջազգային առևտրի կարևորագույն հանգուցակետ և արհեստագործական կենտրոն, իր ուրույն տեղն ունի Երզնկան: Գտնվելով Արևելքը արևմտյան Եվրոպայի երկրների և Ռուսաստանի հարավային շրջանների հետ կապող կարևորագույն երկու ուղեգծերի վրա՝ Երզնկան մասնակցում էր միջազգային առևտրին թե՛ որպես Թավրիզ-Այաս քանուկ մայրուղու օղակներից մեկը, և թե՛ որպես Տրապիզոնի ցամաքային մատույց: Այսպիսով Երզնկայի առևտրականները Մերտ կապերի մեջ էին Կիլիկյան նավահանգիստների, Տրապիզոնի, Ղրիմի, ինչպես նաև Իրանի ու Հայաստանի վաճառաշահ քաղաքների՝ հատկապես Թավրիզի ու Անիի հետ (Խաչիկյան 1951, 74: Գևորգյան 2012, 111):

Իրենց հուշերում Երզնկայի մասին ուշագրավ և արժեքավոր տեղեկություններ են թողել 12 – 14-րդ դարերում այստեղ այցելած ճանապարհորդները: Եվրոպացի ճանապարհորդ Մարկո Պոլոն գրում է. «Այս մի մեծ երկիր է: Սկսվում է մի քաղաքից, որ կոչվում է Արզինգա, որտեղ հյուսում են աշխարհի լավագույն բեհեզները: Երկրի ժողովուրդը հայեր են» (Հակոբյան 1932, 48):

Արաբ պատմիչ Իբն-ի Բատուտան (14-րդ դար) գրում է. «Արզանջանի (Երզնկա) բնակիչների մեծագույն մասը հայ է. մուսուլմանները խոսում են թուրքերեն. այնտեղ կան լավ կարգավորված շուկաներ. այստեղ շինում են գեղեցիկ կերպասներ, ով իր անունով են կոչվում: **Նրա մեջ կան պղնձի հանքեր, որով շինում են ամաններ և «բայտուս»-ներ, որ հիշեցինք. դրանք նման են մեր աշտանակներին**» (Իբն-ի Բատուտա 1940, 31):

17-րդ դարի վերջերից (1639 թ. Կասրե-Շիրինի պայմանագրով Հայաստանի բաժանումից հետո) մինչև 20-րդ դարի սկիզբը Երզնկան Էրզրումի էյալեթի նույնանուն գավառակի կենտրոնն էր (Հայաստանի ազգային ատլաս 2008, 56–57: Բադալյան 2015, XXIX–XXX):

19-րդ դարում Երզնկայում պղնձագործությունը գտնվում էր յուրօրինակ բարձր մակարդակի վրա (Միրմէնեան 1947, 180: ՀԺՊ 1974, 96): Ուշագրավ է, որ նշված ժամանակահատվածում Երզնկայում գոյություն ունեցող մետաղագործական արհեստների մասին խոսելիս հեղինակը պղնձագործությունը թվարկում է **«ճարտար արուեստների»** շարքում (Միրմէնեան 1947, 180): Նա նախապես թվարկում է արհեստները՝ «ոսկերչություն, երկաթագործություն, դարբնություն» և այլն ... (Միրմէնեան 1947, 169–172), այնուհետև՝ **«Տեղական ճարտարուեստը»** (Միրմէնեան 1947, 175) ենթավերնագրի ներքո նշում պղնձագործության և անագագոծության մասին (Միրմէնեան 1947, 180–181): Ինչպես տեսնում ենք, այստեղ

ուկերչությունը նշված է դարբնության և երկաթագործության հետ միասին, իսկ պղնձագործությունն ու անագագծությունը (անագապատում)՝ որպես **ճարտարարուեստներ**: Ավելին՝ շեշտում է նաև, որ Երզնկայի վարպետների պատրաստած պղնձագործական արտադրանքը (ափսեներ, ինքնատներ, գեղեցիկ ու նուրբ ջրամաններ) բարձր գնահատանքի և պարգևի է արժանացել Փարիզի, Վիեննայի և Ֆիլադելֆիայի համաշխարհային ցուցահանդեսներում (ՀԺՊ 1974, 96: Միրմենեան 1947, 180):

### Կարսի նահանգ

Կարսն Արևմտյան Հայաստանի այն նշանավոր քաղաքներից էր, որտեղ դեռևս միջնադարում Բարձր զարգացման էին հասել արհեստներն ու առևտուրը: 10-րդ դարում դառնալով Բագրատունյանց մայրաքաղաք, Կարսը, հայ պատմիչների վկայությամբ, վերածվեց խոշոր առևտրաարհեստավորական կենտրոնի, որտեղով անցնում էին Արևելք-Արևմուտք տարանցիկ առևտրական ճանապարհները ( Բագեյան 2006, 42):

1828–1829 թթ. ռուս-թուրքական պատերազմից հետո Կարս քաղաքի և շրջակա գյուղերի հայ բնակչության մի զգալի հատված գաղթեց՝ հաստատվելով Գյումրիում և Շիրակում: Չնայած դրան՝ քաղաքը չկորցրեց իր առևտրաարհեստավորական դերը, իսկ 1878 թ. Ռուսաստանի կազմի մեջ մտնելուց և առանձին վարչական միավոր դառնալուց հետո նոր վերելք ապրեց (Բագեյան 2006, 42):

Կարսում գոյություն ունեցող արհեստների մասին տեղեկություններ են պահպանվել Ատրպետի «Ինչ ժառանգեցինք» աղբյուրագիտական մեծ արժեք ունեցող ուսումնասիրության մեջ: «Ինչ ժառանգեցինք»-ը գրվել է 1933 թ. Լենինականում (այժմ Գյումրի) և վերաբերում է Ատրպետի ծննդավայր Կարս քաղաքին: Հեղինակն իր աշխատության առաջաբանում կարևորում է արհեստների դերը հայ ժողովրդի կյանքում, գտնելով, որ «միակ փրկիչը արհեստավորն է»: Հատկանշական է, որ հեղինակն իր սեփական քննությունն է կատարում, անցկացնում է պատմական զուգահեռներ՝ հաստատելու համար հայոց մեջ տվյալ արհեստի վաղ ծագումն ու զարգացումը, դրա տարածվածությունը, ներկայացնում է արհեստավորական արտադրանքի արդյունահանման ծավալները և այլն (Բագեյան 2006, 43):

Ուսումնասիրությունը գրված է խիստ կանոնակարգված, ողջ նյութը բաժանված է տասը մասի, 35 գլուխների, սրանք էլ՝ ենթագլուխների: Գլուխները վերաբերում են մայր արհեստներին, բաժինները՝ դրանց առանձին ճյուղերին, իսկ ենթագլուխներում ներկայացված են դրանց նեղ մասնագիտացումները (Բագեյան 2006, 43):

Աշխատանքի վեցերորդ մասը կոչվում է «Մետաղներ», գլուխները նվիրված են մետաղագործական արհեստներին՝ «Գլուխ XIV Պղինձ», «Գլուխ XV Դարբնոցներ», «Գլուխ XVI Վոսկերիչներ», «Գլուխ XVII Քանդակագործներ», «Գլուխ XVIII Թիթեղագործներ»:

«Պղինձ» գլխում ներկայացված է Կարսում գոյություն ունեցող պղնձագործական արհեստի վիճակը, որը ոչ ամբողջությամբ մեջբերում ենք այստեղ.

«§ 160. Հայաստանի ինչպես ամեն մի գավառը, ամեն մի լեռնաշղթան ու ապառաժը հարուստ են պղնձի հանքով, այդպես էլ ամեն մի ավանը և քաղաքը ունեն իրենց պղնձագործների արհեստանոցների շարքը: Պղինձն ինչպես անհրաժեշտություն է հասարակության, այդպես էլ ամեն մի տան մեջ նա բազմաձև է իր բարձր դիրքով. չի կարելի գտնել մի երկրագործի, հովվի, բանվորի և առևտրականի տուն, որ պղնձի ամաններ և գործիքներ չունենա: Մի առած կա, հին առած մեր երկրում, որ ասում է. «Դատիր, վաստակիր, վաստակդ տուր պղնձի կաթսային» (Ատրպետ, Ինչ ժառանգեցինք, 54):

«Կարսում Հաջի Աբեյր օղլուի *խանին*<sup>4</sup> կից իր արհեստանոցն ու ձուլարանն ուներ *Մոլսի Պասպան, որի փոհմը Կարսում դարերով ունեցել է* պղնձագործի ձուլարանը, կոտորածներից, արձակումներից միշտ ազատվել են շնորհիվ իրենց արհեստանոց-ձուլարանով: Տիրող տարրերը-հափշտակողները կարիք էին ունեցել ձուլիչ արհեստավորների և ստիպված հովանավորել ու պաշտպանել են վարպետ արհեստավորներին: 1830 թ. հետո Կարսի նահանգի բովերը դադարեցին գործելուց, քարածուխով հալված պղնձի դեմ, չէին կարող փայտի ածխով հալված պղինձները գործել, քանի որ եվրոպական գործարաններից ... ստացած պղինձը չորս հինգ անգամ ավելի աժան էր նստում: *Մոլսի Պասպոն* հին, մաշված ջարդված պղինձները կիսագնի հավաքում, հալում, ձուլում, թերթերի էր վերածում և գործադրում (Ատրպետ 1933, 54):

§ 161 Կ. Պոլսի վաճառականները Եվրոպայից բերել տված թերթ-թիթեղի վերածված պղինձն ուղարկում էին Արզրում, Երզնկա, Կարս, Վան և այլուր, բայց այս պղինձը երեք չորս ձեռք անցնելով ավելի թանկ էր նստում, քան թե հների նորիլը: Բացի *Մոլսի Պասպոյից* Կարսում կենտրոնացան Ալաշկերտից, Արզրումից, Երզնկայից, Արդվինից պղնձագործներ, որոնք շուկային տիրել էին և լավ գործ ունեին: Բայց հեռավոր գավառներում Օլթի, ..., *Կաղզվան* և Արդահան էլ կային պղնձագործներ, որոնք ևս շրջանի ազգաբնակչության կարիքներին բավարարություն էին տալիս (Ատրպետ 1933. 54):

§ 162 Կարսի նահանգը հարուստ է ո՛չ միայն ... պղնձի հանքերով, այլ *Կիցկիմ, Թորթոմ, Օլթի, Կոթի, Արդահան, Ախալքալաք, Ծալկա, Լոռի, Ալավերդի, Սանահին, Դիլիջան, Բջնի, Կեչառիս* մինչև Սևանի լճի ափերը *մասնագետք հանքաքանները* երեք հարյուրից ավելի բովեր էին բացել, որոնք գործել էին հնումը 40–50 դար և որոնք միառժամանակ 19-րդ դարում դադարեցին, գործել (Ատրպետ 1933. 55):

Պղնձի բովերի մշակությունը, պղնձագործությունը և ձուլարանները շատ վաղ ժամանակներից զարգացել էին ո՛չ միայն Արարատյան աշխարհում, Գուգարքում, Ուտիքում, այլ նաև հսկայական չափերի է հասել Եփրատի ու Տիգրիսի ափերում, Բալու, Արդենա Մադեն, Դիարբեքիր, այլ նաև ծաղկել է է Ուրարտական շրջանից էլ շատ վաղ: Ասորեստանի ինքնակալները արշավել էին Նաիրի երկիրը...» (Ատրպետ 1933. 55):

Երզրումի և Կարսի արհեստների մասին խոսելիս Խ. Մառանկոզեանը տեղեկություններ է հաղորդում նաև 19-րդ դարավերջում նշված քաղաքներում գոյություն

4 Շեղ տառերով գրված են ձեռագրի դժվարընթեռնելի հատվածները:

ունեցող էանաֆույթյունների (համքարությունների) մասին: Այստեղ նույնպես, ինչպես Կեսարիայում և Մալաթիայում, բացի արհեստավորների միջև և այլ հարցերը կարգավորելուց, համքարությունները կատարում էին իրենց հասարակական-կարգավորիչ դերը (Մառանկոզեան 1891ա, 1, 2: 1891բ, 1, 2: 1981գ, 1, 2: 1891դ, 1, 2):

**Այսպիսով**, ամփոփելով վերը նշվածը, կարող ենք նշել, որ պղնձագործությունը Արևմտյան Հայաստանում 17–20-րդ դարակազմում, չնայած քաղաքական և տնտեսական վայրիվերումներին, ունենալով վերելքի ու վայրէջքի պահեր, ընդհանուր առմամբ եղել է բարձր մակարդակի վրա՝ միաժամանակ լինելով և որպես արհեստ և որպես ժամանակի արդյունաբերության կարևոր ճյուղ: Կարևոր է նաև այն հանգամանքը, որ պղնձագործական արհեստը, ինչպես և գոյություն ունեցող մյուս արհեստներն ու առևտուրը, այս ժամանակաշրջանում գտնվել են եթե ոչ գերազանցապես, ապա հիմնականում հայ վարպետների ու վաճառականների ձեռքում:

Եվ վերջապես՝ կարևոր է նաև այն, որ եղել են պղնձագործների համքարություններ կամ արհեստակցական միություններ, որոնք բացի իրենց բուն նպատակից ունեցել են նաև որոշակի հասարակական-կարգավորիչ դեր: Ճիշտ է, հիշատակություններ կան միայն Կեսարիայի, Մալաթիայի, Երզնկայի, Էրզրումի և Կարսի պղնձագործական համքարությունների վերաբերյալ, սակայն բերված նյութը թույլ է տալիս ասելու, որ նման համքարություններ գոյություն են ունեցել նաև վերը նշված արհեստավորական մյուս կենտրոններում:

## ՕԳՏԱԳՈՐԾՎԱԾ ՍԿԶԲՆԱՂԲՅՈՒՐՆԵՐԻ ԵՎ ԳՐԱԿԱՆՈՒԹՅԱՆ ՑԱՆԿ

### Սկզբնաղբյուրներ

Ատրպետ «Ինչ ժառանգեցինք» – ՀՊԹ, ԱԼՖ, գործ 176:

Լալայան, «Կարևոյ գաղթականություն», ՀՊԹ, ԱԼՖ, գործ 11:

ՄԱՌԱՆԿՈԶԵԱՆ 1891ա – Մառանկոզեան Խ., Էրզրումի և Կարսի արհեստատուրների համայնական կարգերը, «ՄՇԱԿ» թերթ, Թիֆլիս, 1891, N 65:

ՄԱՌԱՆԿՈԶԵԱՆ 1891բ – Մառանկոզեան Խ., Էրզրումի և Կարսի արհեստատուրների համայնական կարգերը, «ՄՇԱԿ» թերթ, Թիֆլիս, 1891, N 66:

ՄԱՌԱՆԿՈԶԵԱՆ 1891գ – Մառանկոզեան Խ., Էրզրումի և Կարսի արհեստատուրների համայնական կարգերը, «ՄՇԱԿ» թերթ, Թիֆլիս, 1891, N 67:

ՄԱՌԱՆԿՈԶԵԱՆ 1891դ – Մառանկոզեան Խ., Էրզրումի և Կարսի արհեստատուրների համայնական կարգերը, «ՄՇԱԿ» թերթ, Թիֆլիս, 1891, N 68:

### Գրականություն

ԱԶԻԶՅԱՆ 2003 – Ազիզյան Ա., Հայաստանի վերաբերյալ տեղեկություններ «Սրբ Ջոն Մանդևիլի ճանապարհորդությունները» երկում (XIV դ.), «Հայոց պատմության հարցեր» 4, Երևան, 2003, էջ 31–35:

ԱԼՊՈՅԱԾԵԱՆ 1961 – Ալպոյաճեան Ա., Պատմություն Մալաթիոյ հայոց, Պէրյոթ, 1961:

ԱԼՊՈՅԱԾԵԱՆ 1937 – Ալպոյաճեան Ա., Պատմություն հայ Կեսարիոյ, Գահիրէ, 1937:

ԱԼՊՈՅԱԾԵԱՆ 1952 – Ալպոյաճեան Ա., Պատմություն Եվրոկիոյ հայոց, Գահիրէ, 1952:

ԱՌԱՔԵԼՅԱՆ 1958 – Առաքելյան Բ., Քաղաքները և արհեստները Հայաստանում IX–XIII դարերում, Հատոր I, Երևան, 1958:



- ԱՄՍՏԻՆ 2016 – Ասատրեան Ա., Հայոց ազգագրութեան թանգարանի պղնձէ առարկաների գեղագարդման ընդհանուր բնութագիրը, «Հայկազեան հայագիտական հանդէս», Հատոր ԼԶ, Պէյրոյթ, 2016, էջ 125–150:
- ԱՄՍՏԻՆ 2018 – Ասատրեան Ա., Սինիները հայոց արանդական կենցաղում, «Հայկազեան հայագիտական հանդէս», Հատոր ԼԸ, Պէյրոյթ, 2018, էջ 253–266:
- ԲԱԶԵՅԱՆ 2006 – Բազեյան Կ., XIX դարի Կարսի արհեստներն ըստ Ատրպետի «Ինչ ժառանգեցինք» ձեռագիր աշխատության, ՀՀ ԳԱԱ Շիրակի հայագիտական հետազոտությունների կենտրոնի «Գիտական աշխատություններ» IX, Գյումրի 2006, էջ 42–46:
- ԲԱԲԼՈՒՄՅԱՆ 2008 – Բարսեղյան Ա., Ժողովրդագրական փոփոխությունների հիմնական միտումները Խարբերդի Նահանգում XIX դարի վերջին և XX դարի սկզբին, «Հայոց պատմության հարցեր» 9, Երևան 2008, էջ 168–180:
- ԲԱԴԱԼՅԱՆ 1986 – Բադալյան Գ., Վանի նահանգը 1840-ական–1914 թթ. (վարչա-քաղաքական և դեմոգրաֆիական ուսումնասիրություն), «Բանբեր Երևանի համալսարանի», Երևան, 1986, № 3, էջ 13–28 :
- ԲԱԴԱԼՅԱՆ 2015 – Բադալյան Գ, Արևմտյան Հայաստանի պատմաժողովրդական նկարագիրը Մեծ Եղեռնի նախօրեին, Մաս երրորդ: Էրզրումի նահանգի կենտրոնական ու արևմտյան գավառները և Էրզրում (Կարին) ու Երզնկա քաղաքները, «Վէմ» համահայկական հանդէս, Երևան, 2015, № 4, էջ 1–XLIII:
- ԲԱԴԱԼՅԱՆ 2020 – Բադալյան Գ., Արևմտյան Հայաստանի պատմաժողովրդագրական նկարագիրը Մեծ Եղեռնի նախօրեին, Մաս 9: Դիարբեքի վիլայեթի Դիարբեքի սանջակը և Մարդինի ու Ջեզիբեի գավառները, «Վէմ» համահայկական հանդէս, 2020 № 1, էջ 154–200:
- ԴՈՒՄԻԿՅԱՆ 2012 – Դումիկյան Ա., Մետաքսի ճանապարհի առևտրում հայերի գործունեության արժևորումը XIII–XIX դդ. ֆրանսիացի ճանապարհորդների հուշագրություններում, «Հայաստանի քաղաքակրթական ավանդը Մետաքսի ճանապարհի պատմության մեջ» (Միջազգային գիտաժողովի նյութեր, 21–23 նոյեմբերի, 2011), Երևան, 2012, էջ 167–174:
- ԳԵՎՈՐԳՅԱՆ 2012 – Գևորգյան Զ., Մետաքսի ճանապարհի Այաս-Թավրիզ առևտրական մայրուղին (XIII դ. երկրորդ կես–XIV դ. առաջին կես), «Հայաստանի քաղաքակրթական ավանդը Մետաքսի ճանապարհի պատմության մեջ» (Միջազգային գիտաժողովի նյութեր, 21–23 նոյեմբերի, 2011), Երևան, 2012, էջ 109–120:
- ԶՈՒԼԱԼՅԱՆ 1985ա – Զուլյալյան Մ., Եվրոպացի հեղինակները Հայաստանի և հայերի մասին (XIII–XVI ԴԴ.). Աղբյուրագիտական ակնարկ, «Պատմա-բանասիրական հանդէս», 1985, № 2, էջ 56–72:
- ԶՈՒԼԱԼՅԱՆ 1985բ – Զուլյալյան Մ., Եվրոպացի հեղինակները Հայաստանի և հայերի մասին (XVI–XVIII ԴԴ.). Աղբյուրագիտական ակնարկ, «Պատմա-բանասիրական հանդէս», 1985 № 3, էջ 23–40:
- ԹՈՔՄԱՃԵԱՆ 2016 – Թոքմաճեան Հ., Գալէմքեարեաններ. Այնթապ-Դամասկոս-Հալեպ, 2016:
- ԻԲՆ-Ի ԲԱՏՈՒՏԱ 1940 – Ոտար աղբյուրներ Հայերի մասին № 2, Արաբական աղբյուրներ, Իբն-ի Բատուտա, քաղեց և թարգմանեց Հ. Աճառյան, Երևան, 1940:
- ԽԱԶԻԿՅԱՆ 1951 – Խաչիկյան Լ., 1280 թվականին Երզնկայում կազմակերպված «Եղբայրությունը», «Տեղեկագիր հասարակական գիտությունների», Երևան, 1951, № 12, էջ 73–84:
- ԽՆԿԻԿՅԱՆ 1977 – Խնկիկյան Օ., Արհեստները բրոնզեդարյան Հայաստանում, Երևան, 1977:
- ԿԱՐԱՊԵՏԵԱՆ 1990 – Կարապետեան Պ., Տիվիթ կոչումը թափծու գրչակալ կաղամարներ հայերեն արձանագրություններով, «Հայկազեան հայագիտական հանդէս», Հատոր ԺԲ, Պէյրոյթ, 1992, էջ 81–106:
- ՀԱԼԱՋՅԱՆ 1973 – Գ. Հալաջյան, Դերսիմի հայերի ազգագրությունը, «Հայ ազգագրություն և բանահյուսություն» 5, Երևան, 1973:

- ՀԺՊ 1974 – Հայ ժողովրդի պատմություն, Հատոր V, Երևան, 1974:
- ՀԱԿՈՒՅՄԱՆ 1932 – Հակոբյան Հ., Ուղեգրություններ, Հատոր Ա, Երևան, 1932:
- ՀԱՅԿ 1959 – Հայկ Վ., Խարբերդ և անոր Ոսկեղեն դաշտը (Յուշամատենան պատմական, մշակութային և ազգագրական), Նիւ Եորք, 1959:
- ՀԱՅԱՍՏԱՆԻ ԱԶԳԱՅԻՆ ԱՏԼԱՍ – Հայաստանի ազգային ատլաս, Հատոր Բ, Երևան, 2008:
- ՄԱԼՈՅԱՆ 2006 – Մալոյան Ա., Լ.-Ֆ. Ֆերիեր-Սովբեֆի տեղեկությունները Տրապիզոնի մասին (XVIII դ. վերջին քառորդ), «Հայոց պատմության հարցեր» 7, Երևան, 2006, էջ 37–46:
- ՄԵԼՔՈՆՅԱՆ 2001 – Մելքոնյան Ա., Ախալցխայի սահանգի վարչաժողովրդագրական պատկերը ըստ թուրքական հարկացուցակների (16-րդ դ. Վերջ–18-րդ դ. սկիզբ), «Հայոց պատմության հարցեր» 2, Երևան, 2001, էջ 26–40:
- ՄԵԼՔՈՆՅԱՆ 2005 – Մելքոնյան Ա., Հայ բնակչության էթնոկրոնական դիմախեղման գործընթացներն Արևմտյան Հայաստանում XVI–XVIII դարերում, «Հայոց պատմության հարցեր» 5, Երևան, 2005, էջ 47–60:
- ՄԵԼՔՈՆՅԱՆ 2012 – Մելքոնյան Ա., Արևմտյան Հայաստանը արևելք-արևմուտք առևտրական հարաբերությունների ոլորտում, «Հայաստանի քաղաքակրթական ավանդը Մետաքսի ճանապարհի պատմության մեջ» (Միջազգային գիտաժողովի նյութեր, 21–23 նոյեմբերի, 2011), Երևան, 2012, էջ 4–17:
- ՄԽԻԹԱՐՅԱՆ 2017 – Մխիթարյան Վ., Ֆրեդերիկ Դյուբուա դը Մոնպերո՝ այդչափ հայտնի և մեզանում այդքան անծանոթ շվեյցարացի ճանապարհորդը (Պատմաաշխարհագրական և քարտեզագրական ուսումնասիրություն), Հայաստանի Հանրապետության և մերձավոր արտասահմանի երկրների տնտեսության զարգացման և տեղաբաշխման ժամանակակից հիմնախնդիրները, Երևան, 2017, էջ 82–90:
- ՄՈՒՐԱՐՅԱՆ 2005 – Մուրադյան Հ., Ժողովրդագրական տեղաշարժերը Կարսի սահանգում XVI–XIX դարի առաջին կեսին, «Հայոց պատմության հարցեր» 4, Երևան, 2005, էջ 61–76:
- ՊԱՏՐԻԿ 1974 – Պատրիկ Ա., Պատմագիրք յուշամատենան Սեբաստիոյ և գաւառի հայտնութեան, Պէյրոյթ, 1974:
- ՍԱՀԱԿՅԱՆ 2002 – Սահակյան Ա., Սեբաստիայի սահանգի Ամասիայի գավառի վարչաժողովրդագրական պատկերը 19-րդ դ. վերջին և 20-րդ դ. սկզբին, «Հայոց պատմության հարցեր» 3, Երևան 2002, էջ 86–90:
- ՍԱՀԱԿՅԱՆ 2003 – Սահակյան Ա., Տիվրիկի գավառակի վարչաժողովրդագրական պատկերը 19-րդ դ. վերջին–20-րդ դ. սկզբին, «Հայոց պատմության հարցեր», 4, Երևան, 2003, էջ 77–83:
- ՍԱՀԱԿՅԱՆ 2007 – Սահակյան Ա., Մալաթիայի գավառի հայ բնակչության թվաքանակը XIX դ. վերջին–XX դ. սկզբին, «Հայոց պատմության հարցեր» 8, Երևան 2007, էջ 209–221:
- ՍԱՀԱԿՅԱՆ 2008 – Սահակյան Ա., Արաբկիրի սանջակի հայ բնակչության թվաքանակը XIX դարի վերջին և XX դարի սկզբին, «Հայոց պատմության հարցեր» 9, Երևան 2008, էջ 155–167:
- ՄԻՒՐՄԷՆՅԱՆ 1947 – Միրմենյան Գ., Երզնկա, Գահիրե, 1947:
- ՍՏԵՓԱՆՅԱՆ 2012 – Ստեփանյան Գ., Շամախահայերի դերը արևելյան Այսրկովկասի առևտրատնտեսական հարաբերություններում, «Հայաստանի քաղաքակրթական ավանդը Մետաքսի ճանապարհի պատմության մեջ» (Միջազգային գիտաժողովի նյութեր), 21–23 նոյեմբերի, 2011, Երևան, 2012, էջ 198–218:
- ՄՐՎԱՆՁՏՅԱՆՑ 1982 – Մրվանձտյանց Գ., Երկեր, Հատոր 2, Երևան, 1982:
- ՍՈՒՔԻԱՍՅԱՆ 2019 – Սուքիասյան Ռ., Սեբաստիայի հայության դեմ կիրառված պետական տնտեսական քաղաքականությունը, 1913–1915 թթ., «Գիտական Արցախ», Երևան, 2019, № 1, էջ 436–444:

ՏԱԳԷՍԵԱՆ 2015 – Տազխեսան Ա., Ցեղասպանության զոհ՝ Ուրֆայի պղնձագործությունը և անոր արհեստագետ Յակոբ Մանարեան, «Հայկազեան հայագիտական հանդէս», Հատոր ԼԵ, Պէյրութ, 2015, էջ 375–398:

ՏԱԳԷՍԵԱՆ 2022 – Տազխեսան Ա., Ակնարկ հայկական արձանագրութեամբ պղնձեայ թասերու վրայ, «Հայկազեան հայագիտական հանդէս», Հատոր 42/1, Պէյրութ, 2022, էջ 339–350:

ՏԱԳԷՍԵԱՆ 2022p – Տազխեսան Ա., Հայկական պղնձեղէնի Սարգիս Զամպարճեանի հաւաքածուն, «Հայկազեան հայագիտական հանդէս», Հատոր 42/2, Պէյրութ, 2022, էջ 525–550:

ՓՈՒԼՏԵԱՆ – 1969, Փոլատեան Ա., Պատմութիւն հայոց Արարկիիի, Նիւ Եորք, 1969:

МАРТИРОСЯН 1964 – Мартиросян А. А., Армения в эпоху бронзы и раннего железа, Ереван, 1964.

Artak Asatryan  
History Museum of Armenia  
sardarapatasatryan@gmail.com

COPPER - SMITH'S ART IN WESTERN ARMENIA  
AND ARMENIAN-POPULATED AREAS OF ASIA MINOR  
IN THE 19<sup>TH</sup>–EARLY 20<sup>TH</sup> CENTURY  
(HISTORICAL - ETHNOGRAPHICAL SURVEY)

**Keywords:** Western Armenia, copper-smith's art, handicraft centers, trade, Tokhat, Erznka, Karin.

In the 19<sup>th</sup>–early 20<sup>th</sup> century, the Armenian copper craft and trade developed in Western Armenia and adjacent Armenian-populated areas. Large handicraft centers were formed in Tokhat, Yerznka, and Karin. The work describes the activity and history of development of these centers.

Արտակ Ասատրյան  
Музей истории Армении  
sardarapatasatryan@gmail.com

МЕДНОЕ ДЕЛО В ЗАПАДНОЙ АРМЕНИИ И АРМЯНОНАСЕЛЕННЫХ  
ТЕРИТОРИЯХ МАЛОЙ АЗИИ 19-ОГО–НАЧАЛА 20-ГО ВЕКОВ  
(ИСТОРИКО-ЭТНОГРАФИЧЕСКИЙ ОЧЕРК)

**Ключевые слова:** Западная Армения, медное дело, ремесленные центры, торговля, Тохат, Ерзнка, Карин.

С 19-ого века до начала 20-ого, в Западной Армении и прилегающих к ней армянонаселенных районах развивались армянское медное ремесло и торговля, образовывались крупные ремесленные центры, в числе которых Тохат, Ерзнка и Карин. В работе описывается деятельность и история развития этих центров.

